


UYAKUKHOLWA YINI LOKU NA?

 Futsi ngaphambi kwekutsi sikhuleke, ngitotsandza kusho loku, kutsi itolo kusihlwa, ngikhholwa kutsi bekungiko, ngitsite kulomunye dzadze, “Uma nje utokwenta njengoba siyaliwe kutsi sente, kutsi bekutoba . . . loluswane lolunenhloko lenemanti, beyitonciphu.” Nenhloko yaloluswane inciphile, itolo ebusuku, ihhafu yinye yeli-intji ngekukalwa ngentsanjana. Ngako lodzadze uyiletse lapha manje.

² Manje, sizatfu ngente loku, dzadze, kungenca yenhloso letsite. Niyabona na? Uma ungabona intfo letsite lephatsekako yenteka, loku kutawenta kukholwa kwakho kwandze kutsi uchubeke ukukholwe. Ngaletinye tikhatsi ngiyakwenta nje loku ku, mhlawumbe, njengekucela umuntfu kutsi asukume, ente sinyatselo noma letimbili, hambisa sandla sakho, nyakatisa umuno wakho, intfo letsite nje labangayenta ngalokwehlukile, kubenta nje babone kutsi konkhe kulungile. Baba nekwetfuka nje futsi bacabange kutsi akunakwenteka, kodvwa kuyenteka ngasosonkhe sikhatsi. Niyabona na? Kufanele kwenteke.

³ Bangakhi lofuna kukhunjulwa emkhulekweni, manje na? Ungatiphakamisa nje tandla takho futsi utsi, “Nkhosi, ngiphe kona”? Asikhotsamise tindhloko tetfu.

⁴ Nkhosi, njengoba siva leli lelihle kakhulu liculo lelidzala lelibandla, lelabhalwa ngumngani loligugu, Paul Rader, “Kholwa Kuphela,” sicabanga manje ngemfana, lowaletfwa nguyise kubafundzi, kungekho ngetulu kwetinsuku letilishumi emvakwekuba Jesu abanike emandla kukhipha emadimoni nekuphilisa labagulako, futsi lapha behluleka mbamba esifeni sekuwa. Futsi babona iNkhosi yetfu ita. Futsi nababe wagijima futsi watsi, “Nkhosi, bani nemusa kitsi. Indvodzana yami ikhungetfwe ngudeveli ngetindlela letehlukene. Ngimletse kubafundzi baKho futsi abakakhoni kumphilisa.”

⁵ Jesu watsi, “Ngingamphilisa, uma ukholwa. Kholwa kuphela.” O Nkulunkulu, Awukantjintji nakancane kusukela lapho: Sengulotsandzako nje lofanako, lokahle, naNkulunkulu lonelulelo. Njengoba Wawusolo unjalo ngalesosikhatsi, Unjalo nanamuhla. Futsi Nkhosi, njengalowo babe, sonkhe siyakhala, “Nkhosi, sita kungakholwa kwetfu Wena.” Kulula kakhulu; sigileka nje etikwako, Babe.

⁶ Sifuna Kukunika kubonga neludvumo ngekutsintsa loloswane itolo ebusuku, kubona kutsi lesosikobho, lebesivuvukile, lokukutsi, kutsi litsambo liphusheke laphuma, sehle ngahhafu weli-intji itolo ebusuku. Sibonga kakhulu ngaloko, Babe. Lapho sati kutsi bodokotela betfu akanalutfo ekucwaningeni ngako, ayikho intfo labangayenta ngako;

kodvwa Wena usenguNkulunkulu, iNkhosi yatotonkhe timo. SiyaKubonga, Babe. SiyaKubonga ngekutsembeka kwalomake, nebumnandzi, nekulalela kubuyisa lentsanjana nekuvinamatselisa etikwalesicephu lesi seliphepha, lapha, kukhombisa sive bufakazi bakhe ngenca yeludvumo lwaNkulunkulu. Kwangatsi wakhe lomncane angaphila futsi abe ngumntfwana lojwayelekile, ngenca yeludvumo lwaKho.

⁷ Buka tonkhe letotandla letiphakanyisiwe, Babe. Ngamunye wabo bekanesidzingo. Nesami siphakeme, naso, Babe, ngenesidzingo. Futsi lapha tinengi lapha, esimeni sencwadzi noma kulelibhokisi, lesidzingako, bantfu labadzingako sibili. Makufezeke, Nkhosi, kutsi ngamunye utokwemukela sicelo sabo kusihlwa. Kwangatsi bangatsatsa lobubufakazi bamake futsi nje njengesibonelo kukhombisa kutsi uma Usho noma yini, kuphelile. Ku...Wena...Lesifanele sikwente kwemukela futsi sente lutfo ngako. Ngumsebenti lophelile.

⁸ Siphe, Nkhosi, kutsi ngayinye yaletincwadzi leti nalamaduku, labantfu labekwe etikwabo, kwangatsi bangaphiliswa. Wonkhe umuntfu lophakamise tandla tabo, Babe, kwangatsi bangasemukela sifiso sabo senhlitiyo. Sikucela, eGameni laJesu. Amen. Ningahlala phansi.

⁹ Bengifuna nje kunikhombisa lentsanjana lapha, leyo dzadze (Nako laph'ukhona. Um-hum.)...kutsi inhloko yaloluswane loluncane vele inciphile njengoba iNkhosi isetsembisile ngaMoya loyiNgcwele itolo ebusuku. AYimangalisi yini na? Ngako, kusinika sibindzi lesikhulu kuba nekukholwa futsi setsembe.

¹⁰ Manje, ngesikhatsi Jesu asho kulesosihlahla, kuMakho 11:23, "Akungabe kusadla namunye umuntfu kuwe kusukela manje kuyembili," Angahle kube akamemetanga. Ngani njengoba, ecinisweni, Bekakhululekile nje ngako, baze bafundzi baKhe nje...ngicabanga kutsi lomunye wabo waMuva. Futsi sa...Ngesikhatsi lolophetfwe kunklinklita, ngesikhatsi senyukela embikweNkhosi Jesu, lomfana waba nesifo sekuwa lesimatima kunaso sonkhe lake abanaso; mhlawumbe, wawela emhlabatsini njengekungatsi bekafile, kodvwa wacondza kutsi bekahlangene naloMunye Lobekanekekukholwa lokungetulu kakhulu kunekwalabobaphostoli.

¹¹ Manje, bengingatsandza lomunye lobekangakholelwa ekuphiliseni kwaNkulunkulu kutsi abuke loku. Jesu bekabanike emandla kukhipha imimoya, kepha bebehulekile. Hhayi kutsi emandla ehluleka, kodvwa bekwehluleke bona. Jesu wabatjela:

"Kungani singakakhoni kumkipha na?"

Watsi, "Ngenca yekungakholelwa kwenu."

¹² Libandla lisenawo emandla. Nkulunkulu akakaze awatsatse emandla aKhe ebandleni, kodvwa libandla alinako kukholwa lokwenele kukwenta kuko. Nguloko kuphela. Kulula kanjalo

nje. Sitama kukwenta kube lukhuni ngaletinye tikhatsi, kodvwa uma wenta liVangeli libelula kakhulu, uyoba nekwelucobo kakhulu, uma nje ubalula sibili kulo: Nkulunkulu washo njalo; loko kuyakucatulula; futsi nguloko kuphela. Futsi likholwe nje, chubekela embili.

¹³ Ngesikhatsi Jesu atsi, “Akungadli muntfu kuwe,” ngani, emacembe bekamahle nje futsi acwebetela njengoba bekanjalo. Ligcolo belibukeka lifana, kodvwa phansi le ngaphansi kwemhlaba kuletotimphandze, kuphila kucala kuncipha kusuke.

¹⁴ Kukanjalo kumdlavuza, kunoma nguluphi luhlobo lwesifo leso–leso longafuna kusicabanga. Uma ungemukela Livi laNkulunkulu, phansi le ekujuleni etimphandzeni, umdlavuza ungahle ube lapho; sandla sakho singaba solo sisegogegile nje. Loko akukahlangani ngalutfo nekuphilisa kwaNkulunkulu. Kukutsi, “Uma ungakholwa.” Niyabona na? Phansi le ndzawanatsite, sekuvele kwehlile kuyosebenta.

¹⁵ Jesu watsi, “Uma utsi kulentsaba, ‘Cukuleka,’ futsi ungangabati enhlitiyweni yakho, kepha ukholwa kutsi loko lokushito kutawufezeka, ungabanako loko lokushito.” Akutsandzeki loko na? Kungavela kubani loko na? INdvodzana yaNkulunkulu, emaVi aYo . . . Emazulu nemhlaba kutawendlula, kepha manje . . . kepha emaVi aKhe awayuze.

¹⁶ Manje, indlela kuphela longakwenta ngayo loko, ufanele ube nenhloso lengiyo nenjongo lengiyo. Manje, uma ngiphume lapha futsi ngatsi, “Ngitokukhombisa kutsi ngingayicukula lentsaba, ‘Cukuleka, ntsaba.’” Ayiyuze inyakate. Impela ngeke. Akunandzaba kutsi benginani. Kufanele kube . . . Kucala ufanele utfole intsandvo yaNkulunkulu.

¹⁷ Ngulesosizatfu, ngalokuvamisile emalayinini emkhuleko, ngi–ngitfole lokulukhuni kwendlula konkhe impela, kungoba kuyintfo letsite lehambe yadzabula emalayinini nalokunye nalokunye, futsi kulapho ukutfole khona kubuya. Kodvwa niyabona, uma unesono lesingakavunywa . . . Nike nacaphela ekuguleni, ngaphambi kwekutsi ngitjele umoya lomubi kutsi uphume na? Ngibukisisa lesosifo ngekuciniseka sibili kutsi ngiciniseke kutsi akukho lutfo kuloko kuphila lokungavimbela noma yini, niyabona, ngoba khumbulani, kuletiphiwo, ungangena enkingeni ngato.

¹⁸ Nkulunkulu, niyakhumbula ngalesinye sikhatsi, waniketa umprofethi . . . wenta umprofethi kumuntfu, Mosi, futsi wamtjela kutsi aye entasi, akhulume edwaleni. Futsi lomprofethi bekajabule kakhulu, wase uyaphuma, futsi washaya lidvwala, kukhuluma ngebutsakatsaka baKhristu, kutsi Uyofanele afe kwesibili noma ashaywe kwesibili. Bekanemandla ekukuletsa, kodvwa kwakungesiyo intsandvo yaNkulunkulu.

¹⁹ Angizange sengikholwe kutsi kwakuyintsandvo yaNkulunkulu kutsi Eliya ahambe lapho, ngoba labobantwana bebamdlalisa ngekuba nemphandla, angicabangi kutsi bekafanele akwente loko. Kodvwa bekangumprofethi, futsi wafukutseliswa, futsi wabeka sicalekiso kulabo bantwana nemabhele lamabili lamasikati abulala bantwana labancane labangenacala labangemashumi lamane nakubili. Niyabona na? Kodvwa angikholwa kutsi bekafanele akwente loko. Futsi kona nje—nje... tsine...

²⁰ Nkulunkulu, ngiyakholwa namuhla, ngaphambi kwekutsi Abeke libandla laKhe emandleni, Uvivinya libandla laKhe kubona kutsi litokwentani.

²¹ Tsine... ngesikhatsi lesilandzelako, mhlawumbe, uma iNkhosi ivuma uma sengibuya, siyoba naso sikhatsi kuhlala entfweni lenjengaleyo, entfweni lelungiselela kwenteka, bese-ke siyokwati kakhulu ngako ngalesosikhatsi.

²² Kodvwa uma nje utokhuluma livi, utsi, “Nkhosi, ngiyakukholwa,” ungangabati, ukusho ngenhlitiyo yakho...

²³ Manje, akesitsi kwenta sibonelo nje, bengisesigodzini, futsi angi... Ngishumayela etigidzini tebantfu, kodvwa nje ngesheya kwentsaba laphaya, kunelicembu lebantfu labalikhulu, futsi bayafa ngaphandle kwekwati Khristu. Yebo-ke, ngesigidzi lapha kushumayela kuso, kodvwa noko, iNtfo letsite enhlitiyweni yami ingitjela kutsi, “Welela kulabobantfu. Finyelela kubo. Bayabhubha.” Angifuni kuya cobo lwami, kodvwa noko kuNentfo letsite kimi. Niyabona, lowo nguNkulunkulu ke, ahamba. Niyabona kutsi inhloso iyini, niyabona kutsi iyini injongo yekuhamba, hhayi yamine... Manje, uma ngitsi, “Yebo-ke...” Uma inhloso yami ilungile kutsi ngifike ngesheya lapho, kodvwa-ke ngifika etulu lapha futsi nayi intsaba lenkhulu, ngitsi, “Uyati, uma ngifika etikwaleyontsaba futsi ngisindzise bonkhe labobantfu labalikhulu, ngalelinye lilanga bayoba nesitfombe lapho: UMnaketfu Branham, sitfunywa senkholo lesikhulu.” Manje, injongo yami ayikalungi. Lentsaba ingeke iwe. Cha, mnumzane.

²⁴ Kodvwa uma injongo yami nenhloso kulungile, naNkulunkulu enhlitiyweni yami angihola, futsi angeke ngifike etikwentsaba, ngakulentsaba, ngaphansi kwentsaba, bengiyotsi, “Ntsaba, cukuleka.” Mhlawumbe i... Uma ngisho loko, futsi kunganganani ngikushito loko lolohlobo lwemoya lolungile, ngiholwe nguMoya loyiNgcwele, entsandweni yaNkulunkulu, kungahle kungabikho lutfo kodvwa yehle ngesipunu sinye nje lesincane lesigcwele saleyontsaba, kodvwa isendleleni yayo. Ngelilanga lelilandzelako kungahle kube nemaphawondi lamabili lawako. Lilanga lelilandzelako ikota yelithani. Futsi mhlawumbe ngenyanga, emathani lasihlanu lidzilikele ekhatsi. Kuyini ngako na? Ungahle ngisho ungayiboni kwamanje,

kodvwa iyahamba, isendleleni yayo. Ngiyohlala lapho futsi ngibuke into yentiwa, ngoba Nkulunkulu washo njalo naloko kuyakucatulula nje.

²⁵ Ungacabanga loko ngamake wakho lapho kusihlwa na? Kulungile, uma utokucabanga, utawusindza. Kulungile. Loko kutsi uma ukholwa nje: khuluma nje livi futsi uhlale nalo. Niyabona na? Likhohwe nje; bambelela kulo. LikuPhila lokuPhakadze.

²⁶ Manje, kusasa ntsambama...ngitjele Billy, kusihlwa, kutsi awayekele emakhadi ekukhulekelwa, futsi bengifuna kukhuluma. Ngiyavuma, ngeliciniso, bengisolo ngihamba kusukela ngaBhimbidwane, ngesheya kwetilwandle, nasemuva, ePhoenix, ekhaya ngco, nasemuva, nako konkhe ngalokuphelele (loko kuhlola lokufihlakele) ngize ngibe butsakatsaka kakhulu kubelukhuni nekwati kutsi ngime kuphi ngaletinye tikhatsi. Kutsi nje akube ngulokungicedza nya.

²⁷ Bese-ke, ngifanele ngihambe, futsi bona...nine—nine bazalwane ningimemile kutsi ngihlale letinye futsi tinsuku letinengi. Ngikutsakasela kanjani loko. Ngicabanga impela kutsi lesicuku lesi sebafundisi labamangalisako lapha. Ngifisa kwangatsi besingaba nesikhashanyana lesinengana senhlanganyelo. Uma iNkhosi itsandza, ngitobuya ngalesinye sikhatsi. Akukho lokunye, nje kuhamba usuke ebandleni lelinye uye kulelinye futsi ujikelete ucedze lelidolobha nekunivakashela nonkhe. Ngingakujabulela kwenta loko: noma yini lebengingayenta kusita uMbuso waNkulunkulu, loko kutsi, uma benifuna ngikwente. Nekubuya ngalesinye sikhatsi futsi nijoyinane natsi futsi sibe nalomnandzi, umhlangano lomuhle ndzawanatsite.

²⁸ Futsi khumbulani, bazalwane, ngitawube nginikhulekela. Loko yintfo yinye lecinisekile. Futsi ngifuna nine nonkhe ningikhulekele, nonkhe.

²⁹ Futsi manje ngi—ngi...Kusasa ekuseni tinkonzo telibandla kuwo onkhe lamabandla lamahle lehlukene khona la kulelidolobha.

³⁰ Manje, lamanye emacembu lavela eJeffersonville lilapha. Labanye bebangani bami, lomunye wemagonsa ami welibandla, ulapha, uMnaketfu Fred Sothmann. Angikakhoni kubonana naye emhlanganweni. Nemnaketfu...O, labanengi labanye bebangani bami labavela ehla lapho eJeffersonville, wami pri-...mabhalane wami laphaya na—nabobonkhe ulapha, ndzawanatsite kulomhlangano. Ngisengakababoni kwamanje.

³¹ Futsi bazalwane, kunemabandla lamanye lamahle lapha kulelidolobha. Futsi nonkhe nine tivakashi, tfolani linye lawo futsi niye kulamabandla kusasa. Atoniphatsa kahle, nginesiciniseko. Babazalwane labakholelwa kuloluhlobo lwenkonzo. Ngulesosizatfu bahleti lapha etulu ngembali

naphansi etindzaweni lapha, ngoba bayakholelwa kuyo. Futsi ngiyawatsakasela lawomadvodza.

³² Nkhosi, busisa lomkhandlo walabakhulu belisontfo bosomaBhizinisi beFull Gospel lapha lo—losekele lomhlangano ngetimali. Kune...ngikholwa kutsi loko bekungiko, losekele lomhlangano ngetimali. Ngi—ngihamba kakhulu ngalokusekelwe ngibo ngetimali, ngoba ekhatsi lapho... Asikafaneli sibe ngalendlela, kodvwa tikhatsi letinengi, bazalwane uvumela umehlukwana lomncane: njengendvodza ikholwa *intfo letsite* lencane; lenye, *intfo letsite* lencane; kutsi kwenta luhlobo loluncane lwekungevani nekuphatseka kabi lokudzala lokuvela emuva le; bekufanele ngabe sekupholile ngalesikhatsi lesi, kodvwa ku—ku...Futsi uma wena, noma, uma ngitfolo lamaDvodza labosomaBhizinisi beFull Gospel, khona-ke lolohlobo luyasita kukubopha, futsi sihlangane ndzawonye, futsi siba nenhlanganyelo sibili ndzawonye, tikhatsi nje letimnandzi impela. Futsi siyakutsakasela loko. Nkulunkulu awubusise lowomkhandlo walabakhulu belisontfo. Ngikholwa kutsi iNkhosi yawuvusela injongo letsite.

³³ Manje...futsi-ke ngibenenhlanhla lenhle kubona indzawo yeMnaketfu Oral Roberts ngalelelinye lilanga. Futsi hhe, indzawo lenkhulukati, intfo lenhle kakhulu. Kuyi—kusikhumbuto sePhentekhosti.

³⁴ Khona-ke ngawelela kuyaMnaketfu Tommy Osborn, ingulenywe futsi indzawo lemangalisako, indvodza lemangalisako yaNkulunkulu, le...UMnaketfu Tommy nami sisondzelenene nje, neMnaketfu Oral, naye, banaketfu nje labasondzelenene impela, futsi siyatsandzana, futsi sitama ngako konkhe kusebenta yonkhe intfo lesingayenta sentela bantfu lokuhle eMbusweni waNkulunkulu.

³⁵ Ngako-ke impela ngiyawatsakasela lawo madvodza lalapha kulelidolobha emkhatsini wawo onkhe lamadvodza lakahle leninawo. Nine timvu ninebelusi betimvu labamangalisako. Nje ngi, ngitokusho kanjalo. Kwangatsi iNkhosi ingachubeka ibe nani nonkhe ngumkhuleko wami. Futsi manje kusasa ntsambama, ngi...Icala ngasikhatsi sini inkonzo, bazalwane na? Igabence yesibili. Asitsi ngeyekucala—yekucala noma igabence yekucala nifanele nibe lapha kuze bangatiphathamisi tonkhe leletinye tinkonzo.

³⁶ Manje, uma labafana bekasengakanitjeli, kusihlwa banetincwadzi, titfombe nalokunye nalokunye, nematheyiphu, nalokucoshiwe, ne...kwalemihlangano, futsi bayakutsengisa. Kodvwa angeke sibavumele kutsi bakutsengise ngeliSabatha, kusasa. Akukho tincwadzi noma lutfo lolutotsengiswa kusasa. Ngako singeke...asikuvumelanga loko. Naloku labanengi batsite, “Uneliphutsa lelibi mbamba...”

37 Futsi Babe lomdzala Bosworth bekavamise kungitjela kutsi, “O, Mnaketfu Branham, uneliphutsa lapho,” kodvwa nguleyondlela lengitiva ngayo (Niyabona na?), futsi ngi—ngiyativela. Uma uyifuna yinye, bakuniketa yinye, kodvwa uma... Kodvwa singeke sitsengise nge—ngeliSabatha. Cha. Nguloko kuphela. Uma ngikhohwa kutsi, ngifanele ngikuphile, nje... Ngifanele ngihlale nami lucobo. Niyabona na? Futsi ngi—ngifanele ngihlale netinkholelo tami futsi ngako... Noma ungatfumela ekhaya, futsi, etulu endlini, etulu endzaweni futsi ukutfole.

38 Manje kusihlwa, o, nje ase sonkhe nje sikukhohlwe loko, o, kutsi akukho samsebenti lofanele kwentiwa, noma yini lenye, noma imishikashika yelusuku. Asesibeke eceleni yonkhe intfo, futsi sibuke eVini kwemizuzu lembalwa, futsi sibone kutsi Nkulunkulu utokhulumani kitsi ngeLivi laKhe. Futsi kwangatsi ngingakhuleka kutsi Nkulunkulu utosinika lesikhulu kakhulu sibusiso kusihlwa.

39 Gene, bewungangitfumbela yena lowesifazane na? Bewungangitfumbela yini leyontfombatane lencane na? Ayisiyo intfo lenhle na? Bewungatsandza kuya ekhaya nami futsi udlale naSara wami lomncane, lotsi akabemudze *kangaka* na? O, bewungatsandza na? Ngi—bengingatsandza kutsi ukwente. Ucishe abengangawe, futsi uyintfombatanyana yaBabe. Um—hum. Hum. Futsi ngiyakubhejela u—uyamtsandza Babe wakho nawe, awumtsandzi na? Mami na? O, impela uyamtsandza. Intfombatanyana lenhle kunawo onkhe, ngihleti lapha, ngiyibukile. Emehlo lamancane labukeka njengetimbobo letimbili tekusha engubeni yekulala ne—netinwele letincane letinsundvu.

40 Ngiyabatsandza nje bantfwana labancane. Nginemantfombatanyana lamabili ekhaya. Lenye yawo nguRebekah nalelenye nguSara.

41 Lapha esikhatsini lesendlulile, ngangihambile. Omabili angemantfombatanyana aBabe, niyati, futsi ngiyawatsandza. Futsi atsi nje angangena ngifanele ngiwameme futsi ngiwetjatse emahlombe, futsi... nguBecky kuphela losakhule kakhulu kutsi ngimmeme noma ngimetjatse; semkhulu ngangami. Sekangangephula umgogodla wami manje; sem... kodvwa useyintfombatanyana yaBabe, noma kunjalo. Futsi manje, cishe ngalomunye umnyaka, sifuna kumfaka esikolweni seliBhayibheli ndzawanatsite futsi asuke esikolweni sesive sonkhe.

42 Futsi ke, bebagadze Babe, niyati, kutsi efike ekhaya. Ngangikadze ngiphumile ngisemhlanganweni. Futsi kusasa ebusuku bayobe bangilindzile kuze kubesekhatsi nebusuku kwetama kutsi ngingene. Futsi ngako, angangena kusesekuseni impela, cishe ngensimbi yesitsatfu noma yesine nce ekuseni.

Namake uta emnyango futsi angivulele ngingene, futsi bengikhatsese futsi ngikhandlekile, ngi...Lapha etulu ngembali, ngi...uma i...kugcotjwa kuvakala kahle, kodvwa uma loko kuke kwakushiya, ngulapho ungena khona enkingeni. Bangakhi lowake wakwati loko na? Ngani, impela kunjalo.

⁴³ Bukani. Eliya wakhuphukela entsabeni futsi wabita umlilo uvela ezulwini, wabita imvula ivela ezulwini, futsi ke ngesikhatsi uMoya umshiya, wazulazula ehlane tinsuku letingemashumi lamane naNkulunkulu wamtfola, wamdvonsela emgedzeni ndzawanatsite.

⁴⁴ Jona, wehlela entasi futsi wahlala aphila esiswini semkhome tinsuku letintsatfu nebusuku, wakhafulelwa etikwelugu futsi wahambahamba lapho ashumayela. Lidolobha lonkhe laphendvuka futsi weta kuNkulunkulu. Futsi ngesikhatsi lugcobo lumshiya, wenyukela esicongweni seligcuma futsi wacela Nkulunkulu kutsi atsatsa kuphila kwakhe. Niyabona na?

⁴⁵ Ngime eceleni kwelithuna laWilliam Cowper, kungesiko kadzeni, loyo lowabhala lelculo lelidvumile lelo lesilisebentisa enkozweni yetfu yesidlo:

Kunemtfombo loGwaliswe ngeNgati,
Lemunywe emitsanjeni yaEmanuweli,
Lapho toni tibhukusha ngaphansi
kwesikhukhula . . .

⁴⁶ Nake neva kutsi wa . . . kwentekani kuye na? Emvakwekuba lugcobo selumshiyile kuloko, wetama kutfola umfula kutsi atibulale.

⁴⁷ Ngihlala ngesheya ngco kweKentucky Home Lenzala. NaStephen Foster waniketa i-America emaculo ebantfu ladvume kunawowonkhe. Futsi ngesikhatsi sekawabhalile, utfola lugcobo, lolo gcobo, ubhala liculo, khona-ke ngesikhatsi sekaphuma kuko, uyahamba adzakwe. Ekugcineni, wabita inceku futsi watsatsa ilezana futsi watibulala.

⁴⁸ Bantfu abati kutsi labobantfu labaphila emazingeni akamoya bendlulaphi. Manje *lapha*, utiva kwangatsi ungacukula intsaba. Kodvwa ake uvumele lologcobo lusuke kuwe, futsi ucale uphume kulowomnyango (uma kungekho muntfu lapho kutsi akubambe, niyabona) futsi-ke, mhlawumbe kwemahora lambalwa, kulukhuni kuwe, uyatimangala kutsi ukuphi. Futsi khona-ke busuku emvakwebusuku, loko kutsatsa lokuhle kunako konkhe kuwe.

⁴⁹ Futsi lomncane . . . Ngifuna kunicocela ngaSara lomncane kanye naRebekah. Ngako ngekusa lokulandzelako, bengingakhoni kulala, futsi ngavuka, ngangihleti esitulweni, futsi emvakwesikhashana Becky, angulomdzala, beka-bekanemilente lemidze kunaSara, futsi ngako Becky uta uyagijima . . . wavuka, wagcuma waphuma embhedzeni, angamvusi dzadzewabo lomncane, futsi nangu eta adzabula

endlini, agijima kamatima ngangoba angakhona. Bekatsi, “Babe, Babe...” Ngakhipha munye wemilente yami, futsi wagcumela lapho, atisimele kahle impela. Luhlobo lolufana ne—nelibandla lesimanjemanje, niyati, selibesendzimeni sikhatsi lesidze, niyati, cishe iminyaka lelitsantana lelikhulu. Bekatisimela kahle impela, futsi wangigaca ngemikhono yakhe futsi watsi, “O, Babe wami, Babe wami...”

⁵⁰ NaSara lomncane bekane, esiyaluyalwini, wavuka. Yeboke, angati noma bantfwana benu uyakwenta yini, noma cha; wami uyakwenta: Lolomncane utfola lakushiyelewe ngulomdzala etimphahleni. Futsi ngako Sara bekafake emaphijama aBecky, tinyawo titsi atibengaka budze, niyati. Futsi nangu eta, umfo lotsi akabe mfishane, awa, agileka. Futsi wefika lapho, kamuvanyana. Ngako Becky wagucuka, wase utsi, “Sara, dzadzewetfu, ngifuna kukutjela lokutsite.” Watsi, “Ngifike kucala lapha. Futsi ngineligunya lekubangedvwa. Ngako nginaye wonkhe Babe futsi akukholutfo lolukusalele.”

⁵¹ Nguleyondlela labanye bantfu lacabanga ngayo ngenkholo, akunjalo na? Uh—huh. Kunjalo.

⁵² NaSara lomncanyana tatane, walengisa ludzebe lwakhe loluncanyana, nemhlo akhe lansundvu lamancane bekangibuka, futsi wacala wakhala. Futsi Becky sihlatsi sakhe sicamele kusami, angigaca. Ngiyantsandza. Futsi Sara wacala kuhamba wasuka ngoba Becky bekamtsetse wonkhe Babe. Ngakhipha ngekushesha lelinye lidvolo *kanjena* ngamkhweba *kanjalo*. O, wavusa inhloko masinyane futsi wagijima, wagcumela edvolweni lami ngako... Bekangakefiki lapho sikhatsi lesidze nemilente yakhe yayingafinyeleli ngisho esiyilweni. Bekatsi kuba lubatabata kancane (mhlawumbe, njengoba nginjalo, kutsi kuba lubatabata nje kancanyana, niyati), futsi bekanga... bekangakhoni nekufinyelela esiyilweni. Bekangesilo lihlelo lelikhulu, niyati, futsi ngako bekangakhoni kufinyelela phansi esiyilweni lesicinile. Bekangakabhona lapho sikhatsi lesidze ngalokwenele.

⁵³ Futsi ngako, bekatsi kuba luhlobo lwelubatabata, futsi ngamgaca ngemikhono yomibili *kanjena* futsi ngamgaca ngamsondzeta kimi, futsi wabhanyatisa lawomehlo lamancane lansundvu, futsi wabuka emuva kuRebekah. Watsi, “Rebekah, dzadzewetfu,” wa—watsi, “kungahle kube liciniso kutsi umtsetse wonkhe Babe, kodvwa ngifuna kutsi wati intfo yinye: Babe unami wonkhe.” Ngako...

⁵⁴ Loko ku... Kanjalo naye nje Ungitsetse wonkhe. Ngingahle ngingabi nayo imfundvo kubeka tintfo letinkhulu ngalapho, kodvwa kuphela nje uma ngati kutsi Ungitsetse wonkhe, ekubeni lubatabata kwami, Mvumele nje akugace ngemikhono yomibili, kutongenta nje ngitive ngikahle.

55 Yebo-ke, ake sinikele lelinye livi lelincanyana lemkhuleko kuYe ngaphambi kwekutsi sivule Livi.

56 Manje, Babe loseZulwini, siyacondza kutsi sinjengebantfwana nje futsi. Futsi—futsi Uyatsandza kuba natsi, nekukhonta natsi. Futsi njengoba siKukhonta, futsi Wena usitsandza, futsi usibamba ngemikhono yaKho, futsi utfumela phansi uMoya waKho loyiNgcwele, futsi usenta sati kutsi Uyaphila futsi UnguBabe wetfu, siyaKubonga kakhulu impela. Manje, akutsi uMoya loyiNgcwele ufike kitsi kusihlwa. Tsandza inhlitiyo ngayinye, Nkhosi. Siphe sibusiso lesisha. Tfululela ematolo emusa etikwetfu, Babe. Ungabuki etonweni tetfu. Tinengi kakhulu. Nkhosi, titsetselele nje. Tisuse, Babe, futsi nje sitsatse usibeke emikhonweni yaKho, futsi—futsi uphilise kugula kwetfu, futsi—futsi uhlante imiphefumulo yetfu, futsi ukhulule imiphefumulo yetfu, Nkhosi, kuze sitokukhonta futsi sikudvumise Wena, sibe njengebantfwana labancane bagijima ekhatsi endlini, sati nje kutsi Babe usigadzile. Siphe kona, Nkhosi.

57 Manje, akukho-muntfu longakhona ku—kuhumusha Livi. Siyakucondza loko. Johane wabona iNcwadzi esandleni sekudla saKhe lobekahleti etikwesihlalo sebukhosi, futsi kwakungekho muntfu ezulwini, noma emhlabeni, noma ngaphansi kwemhlaba lobekafanele kutsatsa iNcwadzi kutsi ayivule, noma kuchacha timphawu. Futsi nako kwenyuka liWundlu, lelalikadze lihlatjiwe kusukela kwasekelwa umhlaba. Futsi Lalifanele. Futsi Latsatsa iNcwadzi, lase lichacha letimphawu, futsi lavula leNcwadzi. O Wundlu, wota kusihlwa. Sivulele leNcwadzi, Babe, njengoba silindzile kuWe, ngoba sikucela eGameni laJesu, liWundlu laNkulunkulu. Ameni.

58 Ngikhetse kusihlwa, livesi lelincane lemBhalo lapha lemagama lamatsatfu. Kodvwa kucala ngifuna kufundza livesi noma lamabili kuJohane loNgcwele, sahluko 11 ngicala ngelivesi lema 23.

Jesu watsi kuye, Umnakenu utawuvuka futsi.

Martha watsi kuye, Ngiyati . . . uyawuvuka ekuvukeni ngelusuku lwekugcina.

Jesu watsi kuye, Mine ngikuvuka, ne . . . kuphila: loyo lokholwa ngimi, noma besafile, noko utawuphila:

Nalowo lophila akholwe ngimi angeke afe. Uyakukholwa yini loku na?

Watsi kuye, Ya, Nkhosi: ngiyakholwa kutsi wena unguKhristu, iNdvodzana yaNkulunkulu, lobekatakuta emhlabeni.

59 Futsi kwesihloko ngifisa kusebentisa lamagama lamatsatfu: *Uyakukholwa Yini Loku Na?*

⁶⁰ Ngifundze indzaba esikhatsini lesendlule. Ngicabanga kutsi kwakuyingane kwane. Futsi cishe bonkhe bafundisi, ngiyacabanga, bayifundzile incwadzi ya Dkt. Ingraham ye—ye *INkhosana YeNdlu YaDavide*. Yincwadzi lenkhulu. Yona, ngicabanga kutsi, ayisashicilelwa nhlobo. Bengingatsandza kuba nayo ishicilelwe, kuze ngitoyibeka emkhatsini webantfu.

⁶¹ Futsi ekhatsi lapho, ngangifundza sicephu lesincane sendzatjana ngalo Lazaru, nanga Jesu, naMariya, naMartha, kutsi, bodzadze baLazaru. Futsi bengifundza lapho la Jesu bekahlala khona, ngiyakholwa, naMartha naMariya. Bobabili bebangemantfombatane emaHebheru latsandzekako. NaLazaru bekafundza noma acecshelwa kutsi abe ngumbhali ethempelini, enta tincwadzi temtsetfo entela baphristi.

⁶² NaJesu bekanenhlanganyelo lenkhulu, ikakhulukati naLazaru. Uma sifundza encwadzini kutsi lapho Wefika ekhaya labo, naMartha bekatsi kubanekuphatsa kancane ngekulalela emavi aKhe, kodvwa bekaba nekulungiselela lidina futsi adeke litafula, kodvwa Mariya bekahlala etinyaweni taKhe. NaJesu watsi Mariya ukhetse tintfo letincono.

⁶³ Futsi khona-ke, satjelwa kutsi Lazaru kwakunguye lowaletsa Jesu kuJohane, endzabeni yencwadzi yaDkt. Ingraham, ne...ku *INkhosana YeNdlu YaDavide*. Noma kunjalo, loko kungahle kube bekungesilo liciniso, angati, kodvwa nje kwenta sendlalelo sako, kodvwa Bekacatjangelwa kutsi bekahlala nabo.

⁶⁴ Manje, besisolo sifundza kulelelitako, evikini lelendlulile, njalo, kutsi Jesu washo kuJohane loNgcwele 5:19, “Ngi... INdvodzana ingeke yente lutfo ngekwaYo, kepha loko Lebona uYise akwenta: loko iNdvodzana iyakwenta kanjalo. UYise uyasebenta neNdvodzana nayo iyasebenta kuloko.” Niyabona na? “Loko Lebona uYise akwenta.”

⁶⁵ Ngako kwenta loku kubeyindzaba lelungile impela, Babe, Nkulunkulu, kungahle kube wakhuluma eNdvodzaneni yaKhe, Jesu, futsi watsi, “Umngani wakho, Lazaru, utokufa, kodvwa kutoba kwalokuhle, ngako Lishiye lelikhaya. Hamba, ngoba kutocelwa Wena kutsi umkhulekele, noma, umsindzise, futsi—futsi angifuni Ukwente loko.” Uma ningabukisisa lendzaba njengoba sichubeka, nitawubona kukhuphukela kulelociniso laloko impela. Ngako, Jesu, ngaphandle nje kwesecwayiso noma yini, wahamba wasuka endlini futsi waya ndzawanatsite lenye, wangabuyi kulobobusuku. Futsi Wahamba waya kulamanye emadolobha. Futsi kwatsi nje Jesu angalishiya lelikhaya, khona-ke inkhatsato yangena.

⁶⁶ Futsi uma Jesu ashiya likhaya lakho, inkhatsato isendleleni yayo. Khumbulani nje, uma Ashiya likhaya lakho, inkhatsato isendleleni. Uma utfola tinhlango tetinhlaliswano nayo yonkhe intfo isebenta ebandleni lakho ngalokuphelele kakhulu,

njengalenkhulu kakhulu iRickenbacker lenemasilinda lalishumi nesitfupha, futsi ushiye Jesu ngaphandle kwalo, uma Jesu ahamba ebandleni lakho, inkhatsato isendleleni. Yebo, mnumzane, uma Jesu ashiya lihlelo, kutsi baMbeke eceleni futsi batsi, “Yebo-ke, manje asikholwa kutsi letintfo leti betingaba nguletilungile ncamashi nje,” futsi ulandzela lokunye lokutsite, inkhatsato isemgwacweni wayo. Khumbulani loko nje.

⁶⁷ Kungikhumbuta indzaba yeNkhosi Jesu, letfolakala eNcwadzini yaLukha. Niyati ngesikhatsi nje asengumfana Loneminyaka cishe lelishumi nakubili budzala, bantfu bakuBo baMtsatsa, njengoba lisiko linjalo umnyaka ngamunye, enhla emkhosini wePhentekhosti. Futsi baselapho edolbheni laseJerusalema emcimbini futsi banesikhatsi lesimnandzi, siyatfola eBhayibhelini, kutsi bahamba tinsuku letintsatfu ngaphandle kwaKhe. Nekutsi bebacabanga kutsi mhlawumbe, nje bakutsatsa kalula, kutsi Jesu bekangahle kube bekasemkhatsini webantfu bemndeni wabo. Manje, singeke sikwente loko. Ngesikhatsi beta kutsi bendlule kubantfu bemndeni wabo kutfola, Bekangekho lapho.

⁶⁸ Futsi singeke sikutsatse nje kalula, ngoba nje siyiMethodisti, iBaptisti, iPresbyterian, iPhentekhosti, nelimuva letfu nabokhokho betfu bebangemakholwa lamakhulu, siyakutsatsa nje, yebo-ke, kalula, kutsi Jesu ukanye natsi. Singeke sikwente loko. Sifanele sibe sekuchumaneni naYe lonkhe lusuku nawo wonkhe umzuzu. O, ngiyakutsandza loko.

⁶⁹ Ngifuna loko Nkulunkulu langiko manje. Loko batali bami lebebanako, loko bokhokho bebanako, kuyamangalisa, kodvwa (Loko lebebanako kuhle.) Ngicabanga kutsi sisenhla-ke nemgwaco.

⁷⁰ Ake sibone kutsi Uyini namuhla. Angifuni kubuka emuva futsi ngibone kutsi uMnumz. Moody wentani, ngoba sisenhla le nemgwaco kuneMnumz. Moody. Inkhatsato ngemabandla etfu sibuka emuva futsi sitsi, “Yebo-ke, asibone kutsi uMnumz. John Wesley watsini, kutsi labanye babo batsini.” Ngulesozatfu isayensi ikhweshe kakhulu enkhundleni yabo, kunaloko inkholo injalo kuko.

⁷¹ Lapha iminyaka lengemakhulu lamatsatfu lendlulile, sosayensi longumFrentji wafakazela kutsi uma bewungahamba ngesivinini lesikhulu kakhulu semamayela langemashumi lamatsatfu nesihlanu ngelihora, emandla ladvonsela phansi angakutsatsa akususe emhlabeni. Ucabanga kutsi isayensi ingatsatsisela emuva kuloko namuhla na? Bahamba emamayela langemakhulu lalishumi nemfica ngelihora futsi babesolo bachubeka. Bacindzetela baya embili, babuka embili. Kodvwa sifuna kubuka emuva futsi sibone kutsi Moody watsini; Sankey watsini; Finney watsini; Knox, Calvin; labanye balabo. Loko

labakusho kwakulungile. Loko kwakukwemnyaka wabo, kodvwa siyachubeka.

⁷² Mkhulu wami wagibela sihliphi. Ngishayela iFord iV8. Indvodzana yami itondizisa indiza i-jethi. Loko kutsi, siyachubeka. Nguloko inkholo lefanele ibe ngiko. Kufika kweNkhosi sekusedvute. Libandla belifanele lichubekele embili emandleni abo. Isayensi ingakhwela kuphela kangako beseke iyawa, kodvwa sinemitfombo lengakasetjentiswa, lengakate itsintfwe, yemandla, langeke aphele, aNkulunkulu, lebesifanele singene kuyo. Siphila emamayela latigidzi ngaphansi kwelilungelo letfu kusihlwa, lemalungelo emaKhristu lekumele awajabulele. Ngitiva nginemahloni ngami uma ngibuka ngaphandle lapha futsi ngibona tikolwa letinkhulu, nekugula, netinkinga lechubekako khona manje. Libandla letfu belifanele ngabe lihamba esitaladini, liphilisa labagulako, livusa labafile, likhipha bodeveli, lenta tibonakaliso netimanga, lenta umhlaba wonkhe ucondze kutsi Jesu Khristu uyaphila. Nguloko lesifanele sikwente.

⁷³ Ngani, nine nitsi, “Mnumz. Moody akazange. . .” UMnumz. Moody bekangaphili kulolusuku. Kunjalo. Siphila ekuBuyeni kweNkhosi. Futsi nje sikutsatsele phansi kutsi Bekanebantfu bakitsi bemndeni. Kodvwa kulelelinye lilanga ngesikhatsi locela insayeya aphonsele insayeya uMnumz. Graham, siyatfola kutsi Bekangekho emkhatsini wetihlobo tetfu.

⁷⁴ BaMtfolaphi na? Ba—bamtfolaphi Jesu na? Khona lapho labaMshiya khona. BaMshiyaphi na? Emkhosini wePhentekhosti. Simshiyaphi Jesu, limshiyephi libandla na? Emkhosini wePhentekhosti. Uma sikhwasha kulawomandla akadzeni ePhentekhosti nemkhosi wePhentekhosti, siyakhwasha kuJesu. Kunjalo impela, mngani. Siphila ngaphansi kwemalungelo etfu. Yebo, mnumzane

⁷⁵ BaMshiya emkhosini wePhentekhosti, futsi yinye kuphela indzawo iMethodisti, iBaptisti, iPresbyterian, nemaPhentekhostali layoke aMtfole kuyo, kubuyela emuva lapho uMshiyeh khona. Kuphi kutfokota kweNkhosi na? Aphi emandla eNkhosi na? Libandla liyabuta namuhla, “Kwe—kwentekeni kuNkulunkulu wemlandvo na?” Ulindzele bantfu baKhe kutsi baMbitele enkhundleni. Kodvwa li. . .

⁷⁶ Angeke sikwente ngemahlelo. Angeke sikwente ngesayensi lephatselene nengcondvo. Angeke sikwente ngaphansi kwetibalo, noma angeke sikwente ngemfundvo. Siyatehlukanisa, sitehlukanise. Asikehlukani. Singumuntfu munye mbamba kuKhristu Jesu. Sonkhe simunye kuKhristu, futsi emahlelo etfu lingeke lize likwente. Amahle anjalo nje, angeke akwente. Imfundvo yetfu ingumcabo lomkhulukati liVangeli lelake laba nawo, yimfundvo.

⁷⁷ Lesikudzingako akusiyo imfundvo. Sidzinga emandla nekubonakaliswa kwaMoya loNgcwele emuva ebandleni kubonakalisa emandla. Jesu akazange atsi, “Hambani niye eveni lonkhe futsi—futsi nifundzise.” Akazange atsi, “Hambani niye eveni lonkhe futsi nente...” Watsi, “Hambani niye eveni lonkhe futsi nishumayele liVangeli.” Futsi liVangeli kubonakalisa emandla aMoya loNgcwele, luvuko. Sisashoda ngemamayela lasigidzi kunalapho sifanele sibe khona. Asiyeni embili. Asibuyele emuva lapho siMshiye khona emkhosini wePhentekhosti.

⁷⁸ Jesu watsi, kuJohane, ngiyakholwa, esahlukweni 15, Watsi, “NginguMvini; nine ningemagala.” Yebo-ke manje, uma lowoMvini uveta ligala lekucala, futsi lokuvela kulelogala kwabhala incwadzi yeTento, ligala lesibili liyokwenta lenye iNcwadzi yeTento. Leligala lesitsatfu liyokwenta lenye iNcwadzi yeTento. Futsi lonkhe ligala leliphuma kuloyoMvini liyoba ngulelifanako njengoba ligala lekucala lalinjalo.

⁷⁹ Manje, ungafakela, siyakwati loko. Ngisibonile sihlahla lesisawolintji cisha sinetinhlobo letisiphohlongo letehlukene tesitselo kuso. Ngisibonile sihlahla semawolintji sitsela emagrepfruthi, nemalamula, nayo yonkhe lenye intfo kuso, kodvwa kwakufakelelwe ekhatsi.

⁸⁰ Nguleyo indzaba namuhla. Sihlele imibono yetfu, sihlele emahlelo etfu, kodvwa uma lesosihlahla sike sate saveta lomunye wesitselo umvini, sona cobo lwaso, siyoba njengetasekucaleni letahamba tangena kuso. Haleluya! O, libandla liyohlangana ndzawonye, kodvwa sidzinga emandla asekucaleni. Sidzinga Moya loNgcwele, emandla ekuvuka ekufeni kwaJesu Khristu. Nguloko Lasitjela kutsi sikwente.

⁸¹ “NginguMvini, nine ningemagala.” Uma umvini wemagelebisi uveta incenye lensha yesilimo, futsi siveta emagelebisi lamahle laluhlata sasibhakabhaka, umvini lolandzelako loluwukhiphako uyoba nemagelebisi lamahle laluhlata sasibhakabhaka kuwo. Uma uMvini wekucala uphuma, futsi bawela ngaphansi kwemfutfo waMoya loyiNgcwele, futsi benta imimangaliso lemikhulu, netibonakaliso, futsi banameka ngeluphawu bufakazi babo eveni . . . Ngisho labanengi babo nebufakazi babo lucobo, bona, ngengati yabo, banameka ngeluphawu bufakazi babo. Bendlula kutotonkhe tinhlobo tetinhlu pho nayoyonkhe intfo kuletsa leliVangeli. Bahlupheka; bashaywa; bajeziswa. “Sifanele siyiswe eZulwini ngembhedze wetimbali kalula nje, babe labanye balwa kuzuza umklomelo, futsi bantjweza badzabula etilwandle tengati na?” Silindzele kwentani na? “Ngifanele ngilwe uma ngifanele ngibuse. Yandzisa sibindzi sami, Nkhosi.” Impela. Sidzinga i . . .

⁸² Asidzingi lihlelo lelisha. Asidzingi sakhiwo lesisha selibandla. Lesikudzingako namuhla yindzawo lelengaphandle esikhotseni yakadzeni, sibhakabha lesiluhlata sasibhakabhaka, imvuselelo yePhentekhostali lebulala sono, leyatalwa ePhentekhosti futsi seyibuyile ebandleni futsi, emandla aMoya loNgcwele futsi, kuletsa Jesu enkhundleni.

⁸³ Nkulunkulu wemlandvo uhlala njalo avuka enkhundleni ngenzuzwana lobucayi. Siyakudzinga. Nguleyo indzaba ngelibandla letfu namuhla. Sibuyela emuva kakhulu. Siwela emafashinini elive. Futsi kancane kancane, umnyaka ngemnyaka, kucala kufa kancane futsi kubune kushabalale.

⁸⁴ Sikhatsi sekutsena emagala madvutane. Nkulunkulu uyolincuma alibuyisele emuva impela njengoba ngime kulelipuliti. Nkulunkulu uyolincuma alibuyisele emuva kutsi alente litsele sitselo. Uyoncuma imisebenti yelive iphume kulo ngalolunye lwaletitinsuku. Lihlazo lelinje pho, indlela libandla lelichubeke ngayo ngaphansi kweligama lenkholo.

⁸⁵ Futsi siyatfola, uma Jesu asuka, kufa kuyangena. Uma Jesu ashiya libandla letfu, emandla aMoya loyiNgcwele ayesuka ebandleni, licala kuncipha futsi—futsi life. Futsi emvakwesikhashana akusekho lutfo lokunye kulo. Manje, uma Jesu sekahambile, kufa kuyangena. O, kwakusikhatsi lesidzabukisa kanjani na.

⁸⁶ Futsi caphelani, bazulazula lapho, futsi batfumela kuJesu, kodvwa Akefikanga. Batfumela kuYe futsi, futsi Akefikanga, kodvwa Bekati kutsi Bekatokwentani. Uyati kusihlwa, kutsi Utokwentani. Akukalahleki kuYe: Wati kahle hle kutsi yini Lalungiselela kuyenta. Utovusa bantfu, ngalokucinisekile nje njengoba ngime kulelipuliti. Utovusa bantfu ngenca yeliGama laKhe labavela esitukulwaneni sebeTive. Utokwenta.

⁸⁷ Sikhatsi semaJuda lesesisondzele manje, nesebeTive tiyaphela, ngoba nje bachubeke baphuma. Bencaba Khristu; bencaba tibonakaliso tabo; bencaba yonkhe intfo lebitwa ngekumesaba Nkulunkulu, futsi bayibeka imaki ngeluhlobo lolutsite lwekufundza ingcondvo noma emandla adeveli futsi bente... Bahlambalata Moya loNgcwele futsi batinameka ngeluphawu batikhweshisa kuNkulunkulu. NaNkulunkulu uyotsatsa lelodlanzana, emvakwesikhashana, futsi alivuse libe liBandla lelinemandla, bese ke ujikisa uMoya uye kumaJuda, futsi ayise liBandla lebeTive ekhaya. Kunjalo impela. Lisekwakhiweni manje. O, kanjani, sisesikhatsi sekugcina, cishe impela.

⁸⁸ Jesu, Bekati. Futsi emvakwesikhashana Watsi, “Umngani wetfu Lazaru ulele.”

⁸⁹ Ngani, bafundzi bacabanga kutsi bekaphumulile nje kancane. Watsi, “Yebo-ke, uma alele, wenta kahle kakhulu.”

⁹⁰ Yebo-ke, Watsi kuyaKhe...emavi abo, kuze batocondza, watsi, “Ufile, futsi ngenca yenu ngiyatfokota kutsi bengingekho.” Niyabona na? “Ngenca yenu, ngiyatfokota kutsi bengingekho.” Ngoba bebayoMcela kutsi—kutsi aphilise—kutsi amphilise, kodvwa Bekati Bekangeke akwente, ngoba umbono noko wawu...emvakwaletotinsuku letine Wati kutsi bekungulesikhatsi Babe laMtjela ngaso. Kuhle kanjani pho; Watsi ethuneni, “Babe, ngiyaKubonga, Wena sewuwele uvile, kepha ngikusholo laba labeme laceleni.” Niyabona na? Besavele ati kutsi Utokwenta. Watsi, “Ngitohamba ngiyomvusa.”

⁹¹ Manje, sengiyacabanga nje lelokhaya lelincane lelase lephukile sibili. Umondli walo sekahambile, lusizi. O, kuyamangalisa uma unelikhaya lelidzabukile noma inhli tiyo ledzabukile, bese ke Jesu uyabonakala kanye, akunjalo na? Sengiyacabanga nje Martha, wesifazane lomncane lomuhle neveyili lemnyama ebusweni bakhe, naMariya lomncane, nabo babambene lomunye nalomunye, batsi, “Sitokwentani na? Babe naMake usishiyele, nemnaketfu loligugu... Manje, sishiye libandla, futsi sicoshiwe kubo, futsi saphuma salandzela Jesu waseNazaretha. Futsi Sewuwele wadlutfula futsi wasishiya, ndzawanatsite.”

⁹² Sengiyamuva umgceki eta futsi atsi, “Heyi, uphi loyomPhilisi waNkulunkulu, lowo mProfethi waseGalile na? Ukuphi Yena manje na? Niyabona, uma sekufika sikhatsi impela kuYe kutsi ente lokutsite, seWuhambile.” Nako ke. Niyabona, Nkulunkulu nje uyatsandza kwenta loko, kuvumela bantfu, nje, uvumela bantfu batikhombe kutsi babobani, ya, kubavivinya nje kubona kutsi babobani impela. Ubaniketa sibusiso. Uyabonakala, atikhombise Yena lucobo, atetfule Yena lucobo kubantfu, kubona nje kutsi batotsatsa muphi umnyakato, kubona nje kutsi batokwentani ngako.

⁹³ Manje, siyatfola ke, emvakwe—kwetinsuku letimbalwa, tinsuku letine, Lazaru tatane bekasafile. Bamngcwaba. Lusuku lwesibili, lusuku lwesitsatfu, lusuku lwesine... Manje, noma ngubani uyati kutsi kubola kungen a emvakwetinsuku letintsatfu: imphumulo iwela ebusweni, kucala. Bese ke kubola kuyangena; tibungu tesikhumba sicala kudla umtimba. Bamlalisa emhlabatsini, babeka lidvwala lelikhulu etikwemgedze etulu lapho bebamgcine khona. Futsi konkhe kanye ngesikhatsi, intfombatane lencane yayiphuma futsi iguce phansi ethuneni futsi ikhale.

⁹⁴ Futsi emvakwesikhashana, tindzaba tefika, “Jesu sewufikile. SiMbonile angena kulelidolobha.” O, loyo Martha lomncane, loyo lobekakadze kakhulu, ngekubonakala, anakuphatsa kancane kakhulu ngako, wafakaza ngalesosikhatsi kutsi bekentiwe ngani. Nangu eta. Uta ngemgwaco wakhe ngalesosikhatsi, agijima aphuma afuna. Sengiyabeve labanye babo ngasemgwacweni batsi, “Yebo-ke, ngiyacabanga kutsi

sewenelisekile manje, kutsi inkholo yakho beyingemanga.” Wavele wangabanaki nje futsi wachubeka, wendlula ngakubo bonkhe bagecki. Wehlela entasi waze waMbona, mhlawumbe ahleti phansi ekoneni lesitaladi.

⁹⁵ Manje, kubonakala kwangatsi, ufanele... angahle kube bekanelilungelo lekuMtsetsisa ne—nekukhuluma lokubi kuYe. Ngani, akagijimanga wenyuka futsi wase utsi, “Buka lapha, buka lapha, Wena. Ufanele ngabe ungumProfethi, uMuntfu waNkulunkulu. AWuketi leni ngesikhatsi siKubita na? Ngani, siyinhlekisa yelidolobha manje. Siphumile ebandleni letfu kulandzela Wena.” Kwakubonakala kwangatsi bekanelilungelo. Kodvwa niyati, njengoba nje ngashumayela nge, *LiWundlu NeLituba*, nangabe siliwundlu, liwundlu linikela lonkhe lilungelo lelinalo. Kunjalo impela. Alinalutfo ngaphandle kweboya, ngako litofanele linikele ngaloko. Futsi unikela ngalolonkhe lilungelo lonalo kutsi ukhonte Nkulunkulu. Kunjalo impela.

⁹⁶ Bengilandzela besifazane ngendlela bona lagcoka ngayo letimphahla leti letincanyana letindzala, niyati, futsi batsi, “Yebo-ke, si—singeMamelika. Singenta noma yini lesifuna kuyenta.”

⁹⁷ Ngatsi, “Loko kunjalo impela, kodvwa uma uliwundlu, uyonikela ngemalungelo akho.” Kubhema bosikilidi nekuchubeka kanjalo, leyo yintfo lembi kutendlula tonkhe wesifazane lake ayenta. Kunjalo impela.

⁹⁸ Dzadoze watsi kimi, kungesiko kadzeni, akhuluma nami, watsi, “Kodvwa, Mnaketfu Branham, abasalwenti lolunye luhlobo lwetimphahla.”

⁹⁹ Ngatsi, “Kodvwa basayenta imishina yekutfunga nekutsengisa tintfo. Akukho kutilandvulela ngako nhlobo.” Loko kunjalo impela.

¹⁰⁰ Khumbulani, ngalelinye lilanga, ungahle ubemsulwa lapha kumyeni wakho, kodvwa uyophendvula ngekuphinga ngako, nje impela: “Loyo lobuka wesifazane amkhanuke, sewuvele uphingile naye enhlitiyweni yakhe.”

¹⁰¹ Yini indzaba ngebefifazane bePhentekhostali namuhla, nguloko lokungimangalisako. Kutsi nisuke kanjani emgceci lomdzala lololongako. Kutsi bomake benu bebavamise kanjani kuba netinwele letindze, futsi namuhla besifazane bePhentekhosti batipenda njengesicuku seMardi Grasi, futsi bahhule tinwele tabo, futsi bagecke letincanyana letindzala timphahla letimfishane kanjalo, njengayo yonkhe nje indlela... niphume futsi niheshe libala ntsambama, lapho besilisa beta bendlule ngalapho, niyacondza, sifazane, kutsi uyodzingeka uphendvule ngekuphinga nalawomadvodza na? Utiveta wena cobo lwakho kuwo ngaleyonhloso. Ngumoya lomubi ebandleni

nebantfu, futsi abakwati. Baphumphutsekile futsi abakwati. Liciniso.

¹⁰² Mhlawumbe ungahle utsi anginalungelo kusho loko njengemvangeli. Yebo-ke, ngi—ngifanele ngilandzele kuhola kwaMoya loyiNgcwele; nguloko kuphela lengingakusho. Wena...Uma ngihlangana nawe ekwahlulelweni, khona-ke angeke ngadzingeka ngibe nengati yakho etandleni tami. Suka kuwo wonkhe umhlabatsi lobukeka njengaSathane. Khweshu kuwo. Suka kuwo. Angikhatsali kutsi tingakanani tihlabani tamabonakudze...Awukho, lapha, kutowuba sihlabani samabonakudze; uyindvodzakati yaNkulunkulu.

¹⁰³ Ngashumayela ebandleni lalomunye umfundisi kulolokunye kusa, ngesigcila lesidzala, ngesikhatsi bebatsengisa ngetigcila kadzeni. Futsi bebavamise kufika futsi batitsenge endalini. Futsi bantfu beba, bebalila, bakhala, ngoba likhaya labo lendzabuko; bebangasayophindze babuyele kulo nhlobo. Futsi bebafanele bababhacabule. Futsi bebabatsenga njengoba nje bewungatsenga imoto, noma ngani nje, emanani, futsi batsengisa labobantfu.

¹⁰⁴ Futsi ngalelinye lilanga, lotsengako uyafika, lotseng'atsengisele labanye, kulenkulu ifounda-...kulelikhulu lihlati lekulima, njalo. Futsi watsi, "Tingakhi tigcila lonato lotitsengisako na?"

¹⁰⁵ Watsi, "Yebo-ke, nginato lengingantjintjanisa ngato." Bebetama kutenta tibe tinkhulu. Batsatse bomake, bobabe...Uma lowesifazane lebekamshadile lowesilisa bekanguwesifazane lomncanyana lotsambile, bebatsatsa lawa lamakhulu emadvodza laphile kahle futsi babatalanise ku...njengemahhashi netilwane. Kwakungakalungi. Nkulunkulu wenta umuntfu. Umuntfu wenta tigcila. Akukalungi kwekucala nje, nhlobo. Nkulunkulu akahlosi kutsi noma ngumuphi umuntfu abe sigcila. Cha, mnumzane. Futsi akukho...Bukani kutsi kwentekani.

¹⁰⁶ Ngako-ke ekhatsi kwako konkhe loko, lomfo watsi, "Yebo-ke, ngingatsandza kutsenga letinye tato..." Wanaka lomunye umfo lomncane lapho. Bebangadzingeki kutsi bambhacabule. Silevu sakhe sasibheke etulu, inhloko isetulu, njengendvodza lehloniphekile nje, ahambahamba. Futsi nalowo lotseng'atsengisele labanye watsi, "Ngingatsandza kumtsenga."

¹⁰⁷ Watsi, "Kodvwa akatsengisi."

¹⁰⁸ Watsi, "Yebo-ke, ngani na?" Watsi, "Ngabe ungubasi na?"

¹⁰⁹ Watsi, "Cha, usigcila."

¹¹⁰ "Yebo-ke," watsi, "ngani na? Ngabe umondla kancono kunabo bonkhe na?"

¹¹¹ Watsi, "Cha. Udla ngaphandle lapho ekamelweni lekuphakela nato tonkhe. Usigcila."

112 Watsi, “Yini lementa ehluke kakhulu kangaka kunabo bonkhe na?”

113 Futsi lobasi watsi, “Ngangimangala nami lucobo sikhatsi lesidze, kodwa ngalelinye lilanga ngatfola. Ngesheya eveni lendzabuko, uyise uyinkhosi yesive. Futsi naloku nje asihambi akhashane nelikhaya, usati kutsi uyindvodzana yenkhosi futsi utiphatsisa kwayo.” Uma loko... Uma umuntfu waseAfrica angacondza kutsi babe wakhe uyinkhosi, futsi ngesheya ngalapha asihambi eveni lelingatiwa asengati kutsi ngesheya kwelwandle uyindvodzana yenkhosi, bebefanele batiphatse kanjani ke besifazane nebesilisa uma ningemadvodzana nemadvodzakati aNkulunkulu na? Tiphatsise kwayo. Impela. Tiphatseni; tihlanteni futsi nitiphatsise kwemadvodzana nemadvodzakati aNkulunkulu. Akumangalisi, simo lesinjena pho.

114 Naku lapho sikhona. O, Martha lomncane, uta agijima. Bekabukeka kwangatsi bekane—nendlela kutsi asho lokutsite ngaYe. “AwuKeti ngani kumnaketfu na? Buka kutsi siKwenteleni, futsi Usentela phansi.” Yebo—ke, kube bekashito loko, indzaba beyingeke iphele ngalendlela leyenta ngayo. Cha, mnumzane. Yindlela losondzela ngayo esiphiweni sebuNkulunkulu saNkulunkulu. Uma Nkulunkulu atfumela sipho, ufanele kusondzela kuso kahle. Nangabe ulindzele kuke utfole noma yini kuso, ufanele usondzele kuso kahle. NaMartha bekakwati loko. Mhlawumbe bekafundzile ngalwesifazane waseShunemi nemntfwanakhe. Futsi yena... Uma lowwesifazane waseShunemi bekati kutsi Nkulunkulu bekakuEliya, Bekakakhulu kangakanani ke kuJesu na? Impela.

115 Ngako, wenyuka ngekusondzela lokufanele. Ugijimela etulu futsi wawaphansi etinyaweni taKhe. Ngiyakutsandza loko! Wawela etinyaweni taKhe futsi watsi, “Nkhosi...” Leso sigaba saKhe lesikahle. Nguloko Lebekangiko. BekayiNkhosi yakhe. “Nkhosi, kube Bewukhona, umnaketfu ngabe akafi.”

116 O, hhe! O, sengiyabona nje ngibona inhlitiyo yaKhe lenkhulukati lapho Abuka lowo wesifazane lomuhle, tinyembeti tehla etihlatsini takhe. Watsi, “Nkhosi, kube Bewukhona, umnaketfu ngabe akafi.” Bukani kutsi watsini. “Kepha namanje, Nkhosi, naloku afile, naloku tibungu tesikhumba tinyakata emtimbeni wakhe, namanje, Nkhosi, noma yini Longakucela kuNkulunkulu, Nkulunkulu utoKukunika kona.”

117 O, nguleyo imfihlo. Ungahle utsi, “Ngidvonse linethi kusosonkhe sibhedlela. Dokotela utsi ngitokufa, kepha namanje, Nkhosi... Ngikhubateke wonkhe ngesifo sekucacamba kwematsambo; angikhoni kunyakata, kepha namanje, Nkhosi...”

118 Loloswane loluncane lebelunenhloko lenemanti lenkhulu itolo ebusuku. Akukho lutfo longalwenta. Bekangasabalala

futsi achumise inhloko yalo lencane futsi lufe, “Kepha namanje, Nkhosi. . .” UsenguNkulunkulu lofanako. UseyiNkhosi lefanako. “Namanje, Nkhosi. . .” Futsi Uhleti ngesekudla saNkulunkulu Somandla, asincusela etikwetintfo lesitisho kutsi Usentele tona.

119 Manje, ngitiva nginekukholwa mbamba. Impela ngiyativa. Nitongibita ngemgiciki longcwele nakanjani, ngako seningavele nje nicale, futsi nicedze ngako.

120 Ngako, yebo, mnumzane, “Namanje, Nkhosi, noma yini Lokucela kuNkulunkulu, Nkulunkulu utokwenta.”

121 “Celani noma yini kuBabe ngeliGama laMi, Ngitolwenta,” kwasho Jesu.

122 “Namanje, Nkhosi, noma yini Loyicelako, Nkulunkulu Utokunika kona.” O, loko kungahle kube kwagucugucuka enhlityweni yaKhe lenhle.

123 Watsi, “Umnakenu utawuphila futsi.”

124 Watsi, “Ya, Nkhosi. Utawuphila. Bekangumfana lolungile. Uyovuka eluvukweni lwebantfu bonkhe ngelusuku lwegucina.” Lawo maJuda bekakholelwa eluvukweni lwebantfu bonkhe. “Uyovuka ngeluvuko lwetinsuku tekucina.”

125 Mbukeni. Waticoca buncane baKhe. Watsi, “NgikuVuka nekuPhila.” O, hhe. Akuzange sekube nemuntfu lobekangasho loko ngaphambilini. Akekho loyoke kamuva, akusho. NguYe kuphela longakusho. “NgikuVuka nekuPhila,” kusho iNkhosi. “Loyo lokholwa ngiMi, noma besafile, noko utawuphila. Nalowo lophila akholwe ngiMi angeke afe. Uyakukholwa yini loku na?”

126 Watsi, “Ya, Nkhosi.” O, bekati kutsi lokutsite kwasekutokwenteka. Kwakufanele.

127 Uma kukholwa lokucela enhlityweni letsembekile kuhlangu naNkulunkulu, lawo matinyo elisondvo nje ahlangu ndzawonye *kanjalo*. Lokutsite kutofanele kwenteke. Ngiphonsela insayeya kuletetsameli kusihlwa, eGameni laJesu Khristu, akutsi kukholwa kwenu kuchumane naNkulunkulu kanjalo, emizuzwini lembalwa sitawuba nalenye iPhentekhosti. Kutawuba nemvuselelo lenjalo lechumako kulelidolobha, akuyuba nemaphoyisa lenele eveni kubagcina baphansi. Kunjalo. Kuyoba nemvuselelo mbamba. “Namanje, Nkhosi. . .”

128 “Yebo-ke, Nkhosi, sesivele sibanjiwe *kuloku*; sente *loku* futsi senta *lokwa*.” Angikhatsali kutsi wenteni, “Namanje, Nkhosi. . .” Ulindze wena kutsi uMbite. Yena. . . “Uyakukholwa yini loku na?” Impela. Yebo, mnumzane. “Namanje, noma yini LoMcela yona. . .”

129 “NiMbekephi?” Manje, Uya entasi ethuneni. Bekangumuntfu ngalokwenele kutsi akhale; BekanguNkulunkulu ngalokwenele kuvusa lofile.

130 Lapha esikhatsini lesendlulile, wesifazane longuwelicembu lelitsite lebantfu... Angikaze ngikwente umkhuba kunakana nemahlelo. Kodvwa lona wesifazane... Abakholwa kutsi Jesu bekangulonebuNkulunkulu. Batsi Bekangumprofethi nje. Manje, Beka... Nangabe Bekangumprofethi nje, sonkhe sisesonweni. Kusekhatsi kwekutsi bekanguNkulunkulu, kute abesilele kuko kuba nguNkulunkulu, noma shokutsi ke ngumkhohlisi lomkhulu kunabobonkhe live lelike labanaye. Kunjalo. Bekangetulu kwekuba ngumuntfu. Watsi, "Bekangesuye lonebuNkulunkulu."

131 Kunalokunengi kangako kwaloko kulelivangeli lenhlaliswano namuhla; kutanywa kwenta Jesu Khristu umprofethi. Ngani, BekanguNkulunkulu webaprofethi. Impela bekaNguye.

132 Watsi, "Ngitokufakazela ngeliBhayibheli lakho, 'Bekangumuntfu nje.'"

133 Ngatsi, "Kwente."

134 Futsi watsi, "Ngesikhatsi Aya ethuneni laLazaru, liBhayibheli latsi, 'Wakhala.' Bekafanele abe ngulofako noma Bekangeke akhale."

135 Ngatsi, "Dzadze, ngabe lowo ngumBhalo wakho na?" Angikacondzi kuba ngulohlambalata lokungwele lapha kusho loku, kodvwa ngitonitjela lengamtjela kona.

136 Watsi, "Nguloko-ke."

137 Ngatsi, "Leso statimende silula kunemsobho lowentiwe ngesitfunti senkhukhu leyabulawa yindlala." Ngatsi, "Yebo-ke, a—awunantfo longema etikwayo."

138 Watsi, "Ngani, Wakhala. Loko kukhombisa kutsi Bekangulofako."

139 Ngatsi, "Bekangiko kokubili lokufako nalokungafi. BekanguNkulunkulu enyameni."

140 Watsi, "O, ngumbhedvo!"

141 Ngatsi, "Waya ethuneni akhala. Lelo liciniso ngalokwenele, kodvwa ngesikhatsi Aticondzisa buyena baKhe lobuncane... " LiBhayibheli latsi, "Kwakungekho lutfo kutsi uMbuke; kungekho buhle kutsi siMfise." Kodvwa ngesikhatsi acondzisa emahlombe lamancane futsi watsi, "Lazaru, vuka," futsi umuntfu lobesafe tinsuku letine futsi abolile ethuneni, wavuka. Loko kwakungetulu kwemuntfu. Ngikhombise umuntfu longakwenta. Kwakuyini na? Kubola kwamati uMnikati wako. Kuphila kwamati uMdali wako. Lokutsite kwakufanele kwenteke. Wakhuluma nemuntfu lobekafile futsi asethuneni tinsuku letine, wavuka futsi, futsi wema ngetinyawo takhe, futsi waphila. Haleluya! Lowo kwakunguNkulunkulu eNdvodzaneni yaKhe. Yebo, mnumzane. Lowo kwakunguNkulunkulu atatisa

Yena lucobo ngaYe, iNdvodzana. Lowo kwakunguNkulunkulu akhuluma, hhayi umuntfu.

¹⁴² Bekangumuntfu ngesikhatsi Acalata esihlahleni ngalolosuku kutsi atfole latokudla. Lowo kwakungumuntfu. Kodvwa ngesikhatsi Atsatsa imicatsane lesihlanu netinhlati letimbili futsi wondla tinkhulungwane letisihlanu, loko kwakungetulu kwekuba ngumuntfu. Lowo kwakunguNkulunkulu abondla ekhatsi lapho. Bekangetulu kwemprofethi, ngetulu kwekuba ngumuntfu, BekanguNkulunkulu-Muntfu. Impela.

¹⁴³ Bekalele ngemuva kulesosikebhe lesincane ngalobobusuku, naletilwandle leti tibhodla futsi lugcuma lubuya njengesivalo selibhodlela ngaphandle lapho kulololwandle lolunemandla, ngesikhatsi bodeveli labatinkhulungwane letilishumi belwandle bafunga kutsi batoMcwilisa ngalobobusuku. Bekangumuntfu, abutsakatsaka futsi akhatsela ekukhulekeleni labagulako, alele emuva lapho; nalomoya awuzange ngisho uMphathamise. Bekangumuntfu ngesikhatsi Alele, kodvwa ngesikhatsi Avuka, wabeka lunyawo lwaKhe etikwentsambo yemkhumbi, wabuka etulu, wase utsi, “Thula, utsi dvu,” nemimoya nemagagasi kwaMlalela, loko kwakungetulu kwekuba ngumuntfu. Lowo kwakunguNkulunkulu kumuntfu, Atatisa. Kunjalo.

¹⁴⁴ Bekangumuntfu esiphambanweni ngesikhatsi Akhalela umusa. Ngesikhatsi Akhala futsi atsi, “Ngomile,” lowo kwakungumuntfu. Ngesikhatsi Afa, Bekangumuntfu, kodvwa ngekusa kwePhasika ngesikhatsi Aphula timphawu tekufa, sihogo, nelithuna, futsi wavuka futsi, Bekangetulu kwekuba ngumuntfu: KwakunguNkulunkulu entiwe wabonakala. Akumangalisi imbongi yatsi:

Aphila, Wangitsandza; afa, Wangisindzisa;
Angcwatjwa, Watfwala tono tami taya
khashane le;
Avuka, Walungisisa ngesihle phakadze:
Ngalelinye lilanga Uyabuya—O, lusuku
loluligugu!

¹⁴⁵ Watsi, “Ngoba ngiyaphila, nawe uyaphila. Uyakukholwa yini loku na?” Unguye itolo, namuhla, naphakadze. Uyakukholwa yini loku na? Ngiyakholwa kutsi Moya loNgcwele ukhona lapha manje. Uyakukholwa yini loku na? Ngiyakholwa kutsi Utosigwalisa ngeBukhona baKhe. Uyakukholwa yini loku na? Ngiyakholwa Moya loNgcwele ufuna kutfululela Bukhona baKhe, kuphilisa bonkhe labagulako, ente bonkhe labantfu longenawo uMoya loNgcwele bagcwaliswe. Uyakukholwa yini loku na? Niyakholwa ngayo yonkhe inhliityo yenu na? Asisukume sime ngetinyawo futsi siMnike ludvumo. Ngiyakholwa Utowehelela khona manje etikwetfu.

¹⁴⁶ O Nkhosi Nkulunkulu, Mdali wemazulu nemhlaba, Mcalisi wekuPhila lokuPhakadze, Mniketi waso sonkhe siphohle, siya “Kukholwa loku,” Nkhosi. Siyakholwa kutsi lona nguWe lapha emhlanganweni. Siyakholwa kutsi lona nguWe lobusisa imiphefumulo yetfu. Siyakholwa kutsi nguWe lotfululela uMoya waKho etikwetfu. Siyakholwa kutsi Unguye itolo, namuhla, naphakadze. Siyakholwa Uyaphila kuze kube phakadze nemagama etfu abhaliwe eNcwadzini yekuPhila yeliWundlu. Onkhe emazulu nemhlaba kuyowendlula, kepha siyophila phakadze, ngoba Uphila phakadze. Nkhosi, Ukwetsembisile kitsi. Siyakukholwa ngayo yonkhe inhliyo yetfu. Konkhe lokungekhatsi kitsi, siyakukholwa, Nkhosi. NgiyaMtsandza, NgiyaMtsandza.

¹⁴⁷ NiyaMkholwa na? Ngiyakholwa kutsi lona nguMoya loNgcwele. KuNentfo letsite leyehlela kitsi. Uyakukholwa yini loku na? Ngiyakholwa kutsi Ufuna kuphilisa wonkhe umuntfu khona manje. Uyakukholwa yini loku na? Phakamiselani tandla tenu kuYe. Sukumani nime ngetinyawo tenu. Uyakukholwa yini loku na? UMoya loNgcwele ulapha. Loku nguLoko! Phetro watsi, “Loku nguLokwa.” Loku nguLokwa, uMoya loNgcwele.

¹⁴⁸ O Nkhosi, Mdali wemazulu nemhlaba, tfumela emandla aKho, netibusiso taKho, nekulunga kwaKho kulabantfu laba, futsi ubusise tinhlitiyo tabo, futsi ababone kutsi iNdvodzana yemuntfu iyaphila kuze kube phakadze. Siphe kona, O Nkhosi. Sibanikela kuWe, eGameni laJesu Khristu, iNdvodzana yaNkulunkulu.

¹⁴⁹ Noma ngubani longenawo uMoya loNgcwele, phakamisa tandla takho futsi udvumise Nkulunkulu. Ngiyakholwa kutsi Utowehlela kuwe. Lomunye beka tandla takho kubo. Ngilo lelihora. Kungani sisalindza kadze na? Ngiso sikhatsi lesi. Lesi ngiso sikhatsi sePhentekhosti, kubuyela emuva kuNkulunkulu. Lungisana naNkulunkulu, Phentekhosti! Shukumisa inhliyo yakho ngemandla aNkulunkulu lophilako. Akutsi uMoya waKhe ufike ungene kini, ugcwalise imiphefumulo yenu. Ulapha busuku nebusuku, lapha kuphilisa labagulako, kuniketa kubona kulabaphumphutsekile, ngalamakhulu futsi nemandla emandleni Uyatifikazela Yena lucobo kuba ngulophakadze lofanako. Haleluya!

¹⁵⁰ Akadvunyiswe Yena. Phakamisani tandla tenu. Khohlwani kutsi nikuphi; yatini nje kutsi ningakuYe, nekulunga kwaKhe, nenkhatimulo yaKhe, nemandla aKhe, nemusa waKhe uhlala kuze kube phakadze. Ungulofanako phakadze. Alibongwe liGama leNkhosi. Haleluya! O, alidvunyiswe liGama laKhe leliNgcwele.

¹⁵¹ O, umangalisa kanjani, Unemandla kanjani. Bangakhi lotsandza kunikela timphilohle tabo kuNkulunkulu khona manje, kabusha na? Phakamisa sandla sakho. Bangakhi labatsandza

kunikela timphilo tabo kuNkulunkulu na? Nguloko-ke. Phakamisani tandla tenu. Akesibone iPhentekhosti. Akesibone bantfu baNkulunkulu. Ngitophakamisa sandla sami. “Nkhosi, ngilapha. Ngitfume.” Tsatsa iNgelosi ke nemalahle e-altari futsi utfumele emandla aKho etikwetfu, Nkhosi. Nkulunkulu, siphe kona ekugcwaleni kwaMoya waKho, O Babe. Vani umkhuleko wetfu, O Nkhosi. Vani umkhuleko wetfu, njengebantfwana labakholwako lomile. Alidvunyiswe liGama laKhe.

¹⁵² O, njengemagagasi enkhatimulo ehla, o, ematolo emusa. O, akadvunyiswe Nkulunkulu. Kwangatsi imiphefumulo yetfu ingalindza. Uyakukholwa yini loku na? Uyakukholwa yini loku na? Lona nguMoya loyiNgcwele lofikako. Loku ngulawo mandla langabonakali asichubela eMbusweni waNkulunkulu, tibusiso tePhentekhosti. Buyani ekhaya. Nilindzelwe emuva ekhaya. Nibantfu labaligugu. Nkulunkulu ufuna nine nitinikele cobo lwenu. Bafati, tihlanti. Madvodza, tihlanti. Asicale emuva kuNkulunkulu futsi sikhonte Nkulunkulu ngenhlitoyo lehlanteke sibili.

¹⁵³ Akadvunyiswe Nkulunkulu, uMoya loNgcwele ungaphandle emhlanganweni. Nje yenta loko loholeka kutsi ukwente. Nje vumela uMoya loNgcwele uhambe kuwe. Akukho lutfo lengingalusho. Angati nje kutsi ngitsini manje. UMoya loNgcwele ukuso sonkhe nje lesakhiwo. Alibongwe liGama leNkhosi. Ayidvunyiswe iNkhosi. O, Haleluya! Haleluya! Ayidvunyiswe iNkhosi. Ayidvunyiswe iNkhosi. Kumangalisa kanjani pho, kukhatimula kanjani...Kuhle kanjani, kumangalisa kanjani kudvumisa kwalabangwele baNkulunkulu etikwebuso benu, etikweBukhona baMoya loyiNgcwele lapha uhamba futsi usikhombisa inkhatimulo yaKhe ngaphandle kuleti letinkhulu sicuku lesinhlitoye, sidvumisa liGama laKhe.

¹⁵⁴ Gucukelani eceleni futsi uchawulane nalomunye, utsi, “Ayidvunyiswe iNkhosi, mnaketfu. Ayidvunyiswe iNkhosi, dzadze.” Asingene futsi sivumele Nkulunkulu asishukumise. Ayidvunyiswe iNkhosi. Kunjalo. Nonkhe nine maMethodisti, nemaBaptisti, nemaPresbyterian, emaPhentekhostali, nemaSeventh Day Adventist, futsi noma yini longiyo, chawulanani eBukhoneni beNkhosi Nkulunkulu. Nguloko-ke. O, Haleluya! Haleluya! Haleluya! O, ngijabula kakhulu kutsi ngingulomunye wabo. Ngijabula kakhulu. O, udzilita emabondza, uphonsa ngaphandle insila. Inkhatimulo! Inkhululeko eNkhosini, kudvunyiswe liGama laYo lelingcwele...Alibongwe liGama leNkhosi. O, Haleluya! Ayidvunyiswe iNkhosi.

¹⁵⁵ O, ngiyatsandza nje kubona loko: bantfu bachawula sandla salomunye nalomunye futsi bakhatimulisa buso babo. Emandla aNkulunkulu atsi, “Nguloko ke. Nguloko ke, sibantfwana baNkulunkulu. Sonkhe silibandla linye lelikhulu,

umuntfu munye lomkhulu kuKhristu Jesu, uMlobokati waKhe, Lokhatimulisiwe.” Kubuya kweNkhosi kusondzele edvutane. Bantfu bakhe bahlangana ndzawonye futsi batitsandza... ngelutsandvo nemandla eBukhona baKhe. O, loku kufana neliZulu. O, loku kuhle. Amen. O, kukhatimula kanjani, kumangalisa kanjani: kukhonta nje iNkhosi eMoyeni nasemandleni. Sikhatsi lesinjena pho. (Loko bekukuma; siyacala.)

¹⁵⁶ Akukho nje... Ngibatjelile bazalwane, “Bazalwane, akukho ndzawo yekuma.” Akukho ndzawo lapha le... Asikacali, ngako asimi. Nje—nje kuyamangalisa... Bangakhi lotivela akahle sibili na? Bukhona nje beNkhosi, o, hhe, kuyamangalisa, Bukhona beNkhosi lapha.

¹⁵⁷ Manje, Bukhona beNkhosi bulapha kuphilisa labagulako, bente bantfu baphile. Nine Mkholweni nje. NiyaMkholwa na? Uma singaMkholwa, tonkhe tintfo tingenteka. Niyakukholwa loko na? Niyakholwa kutsi loko Bukhona beNkhosi na?


¹⁵⁸ Manje, nisa... Nginikeni umzuzu nje, umzuzu nje manje, futsi nilalele umzuzu nje. Ake ngifakazele kini kutsi nguMoya loyiNgcwele lapha. Ake nginikhombise kutsi uMoya loyiNgcwele, Yena lowo lokhulumako, Yena lowo lowenta lentfo, uyakwati loko. Bangakhi lolapha manje, longene lapha agula na? Asibone tandla tenu. Lowo lobekanezugula... Kunebantfu... .

¹⁵⁹ Kunendvodza leme laphaya. Uyakholwa, mnumzane na? Akunamakhadi ekukhulekelwa laphumile, kodvwa uyakholwa kutsi Nkulunkulu angakuphilisa na? Uyakholwa kutsi Angangitjela inkinga yakho na? Iseluhlangotsini lwakho. Ulungela kuyohlindvwa. Kunjalo. Ligama lakho unguMnumz. Cartwright. Kunjalo. Ngabe kunjalo na? Jikitisa sandla sakho. Kulungile. Hamba uye ekhaya futsi uphile, ngeke ukudzinge. Uyakhukholwa na?

¹⁶⁰ Leyandvodza lebambe loluswane ngemikhono yayo, uyangikhholwa kutsi ngiyinceku yaNkulunkulu na? Uyakholwa kutsi lona nguMoya loNgcwele na? Angikwati, ngabe kunjalo na? Angikaze ngikubone emphilweni yami; sitihambi. Uyakholwa kutsi Moya loNgcwele angangitjela kutsi yini indzaba ngaloloswane na? Lunekucubuka. Kunjalo. Ngabe akunjalo na? Impela. Awusuye walapha. Cha. Unenkhatsato yesisu, uphetfwe ngiso, wena lucobo. Kunjalo, akunjalo na? Uvela eKansas City. Kulungile. Buyela emuva, Jesu Khristu uyakusindzisa. Haleluya! Uyakholwa. Uyakhukholwa ngayoyonkhe inhlotiyo yakho na?

¹⁶¹ Nansi iNgelosi yeNkhosi, ihamba etikwalona wesifazane lomncanyana—lomncanyana impela, lomdzadlana lonemusa, lohleti khona ekhatsi lapha, lophetfwe kuvuvuka kwesitfo sangekhatsi. Uyakholwa kutsi Nkulunkulu utokuphilisa kuloko kuvuvuka kwesifo sangekhatsi, dzadze na? Wena, lonembali lencane lebovu esigcokweni sakho, phakamisa sandla

sakho. Kulungile. Hamba uye ekhaya futsi ululame. Ameni. O, nguNkulunkulu; nguKhristu iNdvodzana yaNkulunkulu. Ivusiwe kulabafile. Ilapha.

¹⁶² Manje, bekani tandla kulomunye nalomunye futsi nje ninikele lesihle sikhatsi semkhuleko, nonkhe ngamunye, ngisacela lomunye ete lapha. Wota lapha, mnaketfu. Nisabeke tandla tenu kulomunye nalomunye kukhombisa kutsi Nkulunkulu uyaphilisa futsi, nginemnaketfu lapha kutonikela ngemkhuleko naye. (Chubeka. Kulungile.) Ludvumo eNkhosini Nkulunkulu. 

UYAKUKHOLWA YINI LOKU NA? SSW60-0402
(Believest Thou This?)

LoMlayeto ngeMnaketfu William Marrion Branham, kwekucala wetfulwa ngesiNgisi ngeMgcibelo, ngenyanga yaMabasa 2, 1960, eHholeni leliKhulu laMaspala waseTulsa, eOklahoma, eU.S.A., utsatselwe ekucopheni kwetheyiphu lenamazibuthe futsi wakhicitwa ungakafinyetwa ngesiNgisi. Loku kuhunyushwa ngeSiSwati kwakhicitwa kwakhishwa yiVoice Of God Recordings.

SWATI

©2018 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Inotsisi yelilungelo lemtsetfo

Onkhe emalungelo agodliwe. Lencwadzi ingaprintwa ngeprinta yasekhaya yentelwe kutsi umuntfu atisebentisele yena noma kutsi iniketwe labanye, mahhala, njengelithulusi lekusabalalisa liVangeli laJesu Khristu. Lencwadzi akukamele itsengiswe, iphindze ikhicitwe tibetinengi, iposwe kuwebsayithi, igcinwe ngeluhlelo lwekutsi iphindze itfolakale, ihunyushelwe kuletinye tilwimi, noma isetjentiselwe kuticelela timali ngaphandle kwemvumo lebhaliwe lecondzile ye Voice Of God Recordings®.

Mayelana nelwati lolwengetiwe noma lwalwenye impahla lekhona, sita uchumane ne:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org